

প্রশ্ন- ৭ : ইবনে সামছ ৭নং- এ আরো দাবী করেছে- “যেসকল বস্তু আল্লাহ্ ছাড়া কারো দেয়ার ক্ষমতা নেই- এমন বস্তু কেউ দিতে পারে বলে বিশ্বাস রাখা বা কারো কাছে তা চাওয়া কুফরী” । তার দাবী কি সত্য?

ফতোয়া : মোটেই সত্য নয় । এমন কোন্ বস্তু আছে- যা আল্লাহ্ ছাড়া কারো দেয়ার ক্ষমতা নেই- ইবনে সামছ তা উল্লেখ করেনি । তাই, তার কথা অস্পষ্ট- যা আইনের দৃষ্টিতে অগ্রাহ্য । ধরুন- বেহেস্ত দেওয়ার ক্ষমতা আল্লাহ্‌র । ধনী বানানোর ক্ষমতাও আল্লাহ্‌র । এ দুটি জিনিসও রাসুল সাল্লাল্লাহু আলাইহি ওয়া সাল্লাম দিতে পারেন বলে কোরআন ও হাদীস দ্বারা প্রমাণিত । যেমন-

(ক) হুযুরের খাদেম হযরত রাবিয়াহ্ ইবনে কাব (রাঃ) কে হুযুর সাল্লাল্লাহু আলাইহি ওয়া সাল্লাম একদিন বললেন- **سَلِّ مَا شِئْتَ** “তোমার যা মনে চায়, আমার কাছে প্রার্থনা করো” । হযরত রাবিয়াহ্ ইবনে কা'ব (রাঃ) আরম্ভ

করলেন-

أَسَأُ لَكَ مُرَافَقَتَكَ فِي الْجَنَّةِ -

অর্থাৎ- “ইয়া রাসুলাল্লাহ! আমি জান্নাতে আপনার সঙ্গী হতে চাই” । হুযুর সাল্লাল্লাহু আলাইহি ওয়া সাল্লাম তা মঞ্জুর করেছিলেন । (মিশকাত)

(খ) শেখ আবদুল হক মোহাদ্দেছ দেহলভী (রহঃ) উক্ত হাদীসের ব্যাখ্যায় আশিয়াতুল লুমুয়াতে বলেন- (অনুবাদ) “উক্ত হাদীস দ্বারা প্রমাণিত হয়েছে যে, আসমান জমীন ও জান্নাতের উপর কর্তৃত্ব করার ক্ষমতা আল্লাহ্ পাক নবীজীকে দান করেছেন” । (আশিয়াতুল লুমুআত) ।

(গ) কোরআন মজিদে আল্লাহ্ পাক এরশাদ করেন- **أَغْنَاهُمُ اللَّهُ وَرَسُولُهُ**

অর্থাৎ- “মদিনাবাসীদেরকে আল্লাহ্ ও তাঁর প্রিয় রাসুল সাল্লাল্লাহু আলাইহি ওয়া সাল্লাম ধনী বানিয়েছেন” (সূরা তওবা) ।

(ঘ) আর একটি বিষয় ধরা যাক- তাক্বদীর পরিবর্তন করা একান্তভাবেই আল্লাহ্র আয়ত্বাধীন। এমন একটি বিষয়ের ক্ষমতাও তিনি হযরত আবদুল কাদের জিলানী (রহঃ)-কে দান করেছেন। এ প্রসঙ্গে হযরত মুজাদ্দিদ আলফেসানী (রহঃ) তাঁর মকতুবাত শরীফে বলেন- (যার বাংলা অনুবাদ করেছেন শর্ষিনার কায়েদ সাহেব মাওলানা আজিজুর রহমান এবং ১৯৭৫ ইং সালের “তাবলীগ” মাসিক পত্রিকায় ছাপা হয়েছে)

“আল্লাহ্র এলেমে এমন কিছু তাক্বদীর আছে- যা কোন কারণে পরিবর্তন হতে পারে। এমন তাক্বদীর পরিবর্তনের ক্ষেত্রে হস্তক্ষেপ করার অলৌকিক ক্ষমতা আল্লাহ্ পাক হযরত গাউসুল আযম আবদুল কাদির জিলানী (রাঃ)-কে দান করেছেন” (মকতুবাত শরীফ মকতুব নং ১২৩ ৩য় খন্ড)। এবার ইবনে সামছ বলুন- আল্লাহ্ কি ক্ষমতা দিয়ে কুফরী করেছেন? হযরত মুজাদ্দিদ সাহেব কি এ কথা বলে কুফরী করেছেন? (নাউযুবিল্লাহ) দোয়ার মাধ্যমে তাক্বদীর পরিবর্তন হতে পারে বলে হাদীস শরীফে উল্লেখ আছে।

মাসিক মদিনা নামের অন্তরালে মদিনা বিরোধী শির্ক ও কুফরীর ব্যবসা করা সমিচীন নয়।

BANGLADESH
JUBOSENA